

## L'affera Conradi – documents disponibels era per rumantsch

Sco che l'institut da perscrutaziun per documents diplomatics Dodi ha communitgà, è il dossier davart l'affera Conradi ussa disponibel era per rumantsch (guarda QR-code a la fin da l'artitgel).

Il 10 da matg 1923 aveva in attentat procurà per ina crisa statala tranter la Svizra e la Russia – la culpa era in randulin grischun: Moritz Conradi. Sia famiglia bainstanta era crudada en pitgira causa la Revoluziun Russa, e per vendetga ha Moritz Conradi perquai mazzà a Losanna il diplomat russ Wazlaw Worowski.

Avant dretgira è l'assassin Conradi però vegnì declerà innocent. E quai ha chaschunà ina «affera» statala. Las relaziuns da la Svizra cun la Russia sovieta èn vegnidas sistidas per plirs decennis. Pir suenter la Segunda Guerra mundiala han las duas regenzas puspè preprendì contacts uffizials.

A chaschun da quest «giubileum» centenar emetta RTR il film da Cuntrasts «L'assassin grischun e la revoluziun» da la cineasta *Helen Stehli Pfister*, mussà per l'emprima giada dal 2017. La ripresa vegn emessa dumengia, il 14 da matg 2023, a las 17.25 sin SRF1 ubain en la rait sin [rtr.ch/cuntrasts](http://rtr.ch/cuntrasts). ([cdm/rtr/fmr](http://cdm/rtr/fmr))



**Dapli da l'affera Conradi (per rumantsch) è da leger cun agid da quest code-qr.**